

耕

祿

藁

胡
銓
撰

中
華
書
局

叢書集成初編所選百
川學海及稗海皆收有
此書百川本在先故據
以排印

以文爲戲曰子虛、曰亡是、曰毛穎、曰革華、曰黃甘、陸吉、往往皆是也。而近之學士大夫、游情翰墨、且以褚知白、石虛中、竹媛之類、作爲制誥矣。蠲牛衣子也。歌豳頌牧之餘、竊有取農田之所殖、農器之所修、其爲書前之大務、輒緝農書爲詔、爲制誥、爲表、凡二十五篇、名之曰耕祿囊、不謂文也。姑亦擊土鼓、樂田畯爾。括蒼胡錡序。

耕祿藁

宋 括蒼胡 銡國器撰

擬力田詔

詔曰。民以食爲天。食不可闕。則農不可惰。堯敬授禹粒。又。罄庚曰。力穡乃有秋。此古者歐民之農。使著本而食其力。我國家躬籍以供祀典。制地以行仁政。詔寬減賦租。勉率亦云至矣。比年以來。嘆愁轉徙。壯者不緣南畝。而無常心。豈簞斤奪其時歟。繇役分其力歟。厚斂以困之歟。朕知無逸艱難。亦惟責躬懼德。弗類。方春時和。土膏脉起。民事不可緩。爾。郡國循行阡陌。宜究民恫。以勸農爲急。若有蠹賊。瘠而稼者。鋤之。爾父老。率子弟孝悌。陳敷舊章。播載于胥。斯田既順。既宜。則自今以始。歲其有民無阻饑。適朕之意。

擬銀青光祿大夫。提舉醴泉觀田萬頃。特授保康軍節度使。兩淮安撫制置大使。兼判揚州。兼提領措置屯田大使。節制本路河南出戍軍馬。加食邑實封制。

建列籩以分封。載嚴維翰。奄全淮而作牧。兼重留屯。疇茲銀信之庸。幡爾琳庭之處。控師干而衛社。隆使指以旌奮。允熟輿言。誕敷大號。銀青光祿大夫。提舉醴泉觀田萬頃。苗而肯播。公以忘私。退睦鄉閭。有同井相友之義。進陪卿伯。爲立極經野之謀。其至忱則忠乎君。其實意則近乎古。頃以仁政之潤澤。推爲太平之紀綱。貢助微。皆便于民。不奢不儉。租庸調。悉寬其法。欲逸欲安。持界限以素嚴。立經制而益謹。無甚富甚貧之弊。見謂均平。縱近臣近親之家。莫敢踰越。方坐致疆原之化。乃祈歸堯壤之耕。亟示勉留。爰加

優渥品特升於華戟。廩發賦於眞宮。少酬在畎之懷。終冀惠疇之用。矧維揚之重鎮。實今日之要區。未雨綢繆。合謹本根之備。及時間暇。常爲兵食之圖。顧惟禮耕義種之賢。足副內修外攘之志。統緩疆場。申畫郊圻。省騎墾渚。宜舉充國破羌之策。分兵關渭。必循孔明定蜀之規。以耒耜執戈。爰以襁褓行介冑。象耘沃野。戰守有經。蟻聚列營。坐作聽命。期復恢於境宇。宜渙錫於山川。是用陟防渚之齋旄。開廣陵之榮鉞。兵事節度。悉歸封履之中。地利便宜。盡入輿圖之內。仍申采錫。庸顯恩崇。於戲。師整戎修。徹士冀歌於周雅。馬騰士飽。平淮宜上於唐勳。往服朕言。式永終譽。可特授保康軍節度使。兩淮安撫制置大使。兼判揚州兼提節措置屯田大使。節制本路河南出戍軍馬加食邑實封。

代田萬頃到任謝表

琳館養恬。冀息斤園之駕。調戈疏寵。誤分淮甸之弓。籲天控避。以弗俞。踴地勉承。而有覩。伏念臣。量慚淺薄。品特下中。少事耦耕。粗得帶經之樂。壯沾圭祿。頗懷憂國之忠。越內外以若疇。辯總結而定賦。千夫萬夫之長。愧匪其材。九推五推之間。備彈其力。迺上從盤之請。欲陶擊壤之情。忽授鉞以總師。俾建麾而顯閫。矧長淮之境土。爲吾國之藩籬。民賴懷生。軍資討賁。秉戈執耒。宜爲足兵足食之思。牧馬飯牛。盡講且戰且耕之政。鞠旅而當其芒。出車而黍其華。戊牛或遺。則無載饑之憂。徒御或嚴。則有峙糧之望。預爲兩徹之計。可收日辟之功。六月出征。敢廢歌。爾於七月。夏官董正。尤常任甸於地官。顧無圻畫之良規。曷副蕃宣之隆寄。茲蓋恭遇皇帝陛下。恢復疆宇。整齊乾坤。一成立中興之基。大披圖籍。九井張太平之紀。丕

混中書內將拓梁山桑突之區外欲歸齊國章章之士知臣粗能積穀故使備邊察臣稍熟分耕故資治
寒庚祭政需於飽餉戊巳宜增於鉅屯臣敢不實擊實墾迺驅迺理三事就緒勉修潰浦之戎萬年揚休
願報上田之德

擬常熟縣開國侯穀實進封常熟縣開國公加食邑實封制

慶有年而介福久疏分井之封播攷績以陟明爰進植圭之秩迺瞻奏艱之惠載推報本之恩允稭師言
誕揭渙號常熟縣開國侯穀實學深種植仁熟滋培一日無食則饑司民之命三代處農而教爲道之原
其和足召陰陽之和其貴能賤金玉之貴謳歌始播婦饁畝以勤勞魯頌于尊牧在垆而蕃碩行師則藉
之輓粟徹疆則資之峙糧持常平使者之權視時登捐佐地官司徒之職待國賜頒疇庸旣課於屢書班
祿宜先於增賦乃刻名於纁壁乃彰用於罍彝爰即侯疆就陞公爵于以重宅生之寄于以顯育教之庸
於戲歲月日時無易而用明朕已建九疇之範水火木金惟修而永賴爾其鉞萬世之功益厲後圖嗣有
華寵可進封常熟縣開國公加食邑實封

代穀實謝表

八政之疇曰食粗喜屢豐九井之田爲公誤叨進秩增畝錫寵擊壤知恩伏念臣函植無奇簸揚有覲勿
正勿忘勿助幸免振苗實衰實發實堅僅能維秬顧何修而何飾蒙載柞以載芟天子元日而祈于郊至
勤聖駕蒙宰杪歲而制其用亦費廟謨偶六穗之告登而三農之胥慶遽超榮於品祿仍加衍於戶租不

稼而困。祇負素殯之愧。奏艱而粒。實歸敦藝之仁。茲蓋恭遇皇帝陛下。心應形聲。化調風雨。正德惟和。惟穀。舜厚其生。休證用乂。用成禹敷其福。異畝遂生於同穎。靡田不挺於稠華。雖已諉狼戾之秋。或慮有鵠形之歲。獎職方而任貢。升庠氏以司儲。猥令燕秦之微。亦被周禾之命。臣敢不茂加播殖。益務滋生。八月穫。十月場。力課服田之事。九年耕。三年食。誓殫憂國之忠。

擬隴西郡開國侯來牟進封關內侯加食邑實封制。

登寶祈春已課兩歧之最。薦名告夏。爰疏易地之封。於皇孔碩之英。貽我奏膚之美。穀差青。日穡播猷言。隴西郡開國侯來牟。外叶坤黃。內涵賁白。載行于野。懷大夫君子之忠。斯饗我農。成先公風化之業。將其來食。遂用康年。渟沱對竈之時。竟能濟業。崑崙跨較之頃。遂底休師。庸進績於農書。復侑忱於寢廟。來咨來茹。有在公助祭之恭。實好實堅。相尊祖配天之道。爰易隴西之舊壤。聿陞關內之新畬。於戲。雨露肥磽之不齊。爾既勉修於人事。山川土田之大啓。朕其加錫於侯功。往服休恩。勉圖後效。可進封關內侯。加食邑實封。

代來牟謝表

代食維好。緒愧乏於善收。往卽乃封。恩誤叨於登進。自天錫命。易地祗榮。伏念臣桑下枯荄。丘中槁苗。鬢髮黃髮。老風雪之彫殘。皦皦素心。抱冰霜之潔白。生樂國而無鼠苗之戚。歷元都而有兔葵之思。因問俗於關中。輒借階於陛下。爰進伸舒之策。令勿後時。至形武帝之憂。詔其益種。欲使畝畟彫靡之所。皆有春

登夏實之資。地方慮於不齊。意敢希於所報。詎期削木之質。遽躋沃壤之區。茲蓋恭遇皇帝陛下。德游祥雲。政如時雨。五穀共衍。藹永平膏沐之權。多黍同登。播元 and 天錫之頌。課吏奏漁陽之最。談兵却新鄭之師。以薦廟而勸相。農民以問價而選掄使者。肆令稗植。亦被播擾。臣敢不小大懷忠。艱難陳業。誦原野南都之盛。已幸富饒。歌宮室故國之虛。尙祈警戒。

擬米秬除祭酒誥

唐得祭酒。生徒皆喜。謂不寂寞矣。蓋橋門冠帶之地。必資醉經距賢而爲之長。以爾學殖素醇。詞英早粲。粵自脫穎而來。詩曰。或春或榆。或簸或蹂。其所踐揚。亦既熟矣。頃登米廩。教思薰陶。士君子已有成周既醉之行。今擢表成均。維其令儀。以式我資饌。使酌道味德者。皆沈浸乎醴郁。則將用汝作醴。往惟欽哉。

代米秬謝表

任閭師之耕。農功舉實。進司成之長。賓饌增華。揆量逾涯。懷榮踏地。伏念臣素無學殖。徒有仁根。后稷教藝以來。芳聯南畝。陶潛賦歸而後。穎露西疇。在前深愧於批糠。若作尙資於粃粃。忽從米廩。叨佩水蒼。清爲聖人中。俾樂道涯之沐。醉有君子行。使沾德海之流。自非沐漢化之鴻醇。何以式周朋之燕滑。茲蓋恭遇皇帝陛下。氣薰嘉協。瑞格和平。常豐年高廩之秋。畀蒸爲體。闡七月公堂之教。獻饗稱觥。將溥陶民俗。於溫溫。適首勸儒風於渾渾。肆令淺薄。亦被涵濡。臣敢不泝戒非彝。禮嚴有旨。招諸生而浸醴郁。盍明立館之規。造三代而樂優游。其適舞雩之趣。

擬馬赦除駕部誥

乘輿法駕公卿奉引太僕御參屬車蓋所以嚴導扈也爾理明芻悅才有駿聲乘馬在廐摧之秣之于牧之職咸休厥功朕甚嘉之今將駕鑾車流明堂擢爾司駕僕臣正厥后克正思無邪思馬斯藏爾其搜舉天閑之政使徒御不驚既碩孔安則爲稱厥職其往欽哉毋失朕命

代馬赦謝表

典廐濫員無裨仰秣司與躡龍有覲分曹聞命凌兢銜恩激烈伏念臣用非穀粟材僅秸稭駒谷逍遙慣飽南山之味駟原濡沃備管顏圃之勞荷不棄於牧芻俾進供於飼餼約軛鳴八鑾之節宜預均調法駕備六馬之參盡先審御騰槽有幸導扈何居茲蓋恭遇皇帝陛下臨下以寬馭臣以爵自強不息時乘六位之飛示朴爲先日却千里之獻屬舉我享我將之禮載嚴既閑既庶之司肆使驚疲獲依騎乘臣敢不益鞭而後載範其馳地熟九方幸已塵於太僕天低五路願長擁於屬車

擬良耜除司農卿誥

自大易取益之利以教天下時則有若此選已居開物成務之先矣爾懷柞風雨之姿樟楠雪霜之氣斲而成之惠我南畝其利已博朕所嘉賴擢儀九扈蓋以后稷之化圖原漢文之躬籍田皆爾之力爾其爲朕率趨末之民而知本起惰安之習而力勤俾五穀皆熟有年屢書是爲毋曠厥職其往欽哉

代良耜謝表

土脉起膏。假嚴斲木之教。天田攜角。誤躋司稷之班。開命凌兢。戴恩偏僂。伏念臣泥塗未脫。賦畝不忘。陳王業以歌謠。粗知大本。利天下以取益。祇效小忠。我田既臧。其笠伊糾。乃或耘而或耔。始載柞以載芟。正以九農播厥百穀。侯伯侯亞。侯甸侯旅。有厭其熏。如茨如梁。如坻如京。終善且有。猥慚芻蕘。濫辱稼卿。茲蓋恭遇皇帝陛下。授曆析因。分田友助。卽功以知稼穡。墾或遑寧。親耕以給粢盛。昭然示勸。爰重中和書之進。載祈秋冬報之豐。肆使畚耰。亦躋扈輶。臣敢不戒其趨末。毋或違時。擊壤而歌。敢云帝力之何有。敍疇以父。當思農政之用成。

擬水部車龍除火陸轉運使誥

作周川衡。已成歲績。爲唐發運。爰重使名。自非負洞達之奇。何以稱轉輸之選。以爾風猷淵湛。器識陂涵。輸困而容之蟠。素無滯礙。犖角而骨之蛻。獨任捲舒。見謂圓機。九流通之材。故有一動萬波隨之譽。已咨決汎。更賴沃焦。旱魃滌滌。繇隆蟲蟲。孰慰兢兢之念。小子蹻蹻。老夫灌灌。其歌板板之詩。迺不憚於勤勞。爰妙加於迴幹。朕深嘉汝最宜究其能。俾司將漕之權。毋效註河之闕。決鴻歌飯。已興陂下之耕。流馬運糧。期進漢中之策。勉加濡沃。嗣有激昂。

代車龍到任謝表

職濫水衡。何補禹疇之用。光濡陽燧。誤叨漢漕之榮。沐浴恩波。沱滂感涕。伏念臣材卑碌碌。量淺沾沾。刊木而龍其輿。粗竭放苗之力。防稻而灌其畜。僅殫掌澮之勞。政漸俛仰以隨人。所冀卷藏而束閣。川適逢

於滁潁泉曷導於源源。洒沽詔墨之鵝籙。俾濯豪文之龜拆。流濕就燥。泄北海以灌涯。自下升高。激西江而挾潤。爰煦斗升之活。以將輦駕之輸。茲蓋恭遇皇帝陛下。德厚海涵。道明川理。見善莫禦。其決化妙流通。從諫如轉。諸圖迹無凝滯。肆令猥瑣。亦玷選掄。臣敢不砥足施功。鞠躬盡瘁。鑿渠引渭。當溥霑涇下之田。輓粟飛芻。願長富關中之廩。

擬趙鍾除金部詰

工欲善其事。必先利其器。爲農亦然。爾仁爲之刃。義淬其鋒。早入爐錘。取鍛取礪。迄用有成。原田每每。拮据撝茶。農亦良苦。非藉爾何以芟夷哉。此詩人所以有良耜。臣工之襲。朕嘉汝結擢司禹金。今而後聚百鍊之精。以鑄農器。俾啓辟攘剔之有其具。以成我黍稷。往若予工。毋廢厥職。

代趙鍾謝表

掌周野之器。請事老農。修禹府之金。誤登劇部。自天開命。無地措躬。伏念臣生本親鋤。實爲至鈍。奮田春暮。其殫庠艾之勞。南畝秋。爰竭薈茶之力。方慚治躍。忽拜秩增。六齊轉人之工。迺令典領。三品揚州之貢。亦俾甄收。豈伊獷頑。足堪器使。茲蓋恭遇皇帝陛下。政堅所執。義成者方。治天下猶在鑪。範于堯。鑄求良弼。用作礪。起自傅巖。盡化買刀。悉歸銷戟。臣敢不切磋磨琢。芟夷蘊崇。斷矣同心。輔大易耒耜之教。作而從革。成洪範稼穡之功。

擬犂春知鍵爲部兼勸農使語

古有農官。我朝分牧者繁。農使示厚本也。爾剛木近仁。遯肥空谷。神光牛背。詵寢莫羈。左迴右抽。往來脩直。高原卑隰。堅栗方苞。亦既著勞効矣。健爲名郡也。畀爾一麾。爾其求距心之蜀。化渤海之糟。俾千里無曠土。亦克用勸。則予汝嘉。

代犂春到任謝表

雨足周原。方協夢魚之兆。地分蜀壤。將還佩犢之風。延見老農。具宣聖澤。伏念臣梓人傳之矩矱。鐵爐步之範模。技雖扼於塗泥。性獨耽於畝畝。駢其勿用。犂爾來思。給荊州之民。無裨強本。供柳中之士。何補增屯。誤簡三推之知。猥被一麾之寵。載循漢陌。共理嘉陵。率彼戍兵。市纈繒而田沃。助其鄰里。勞酒食以疇良。勉收破塊之功。實藉起膏之賜。力殫殺鯨。報祝汗邪。茲蓋恭遇皇帝陛下。輝舊牂羊。明離牝吉。引重致遠。教未耨以變通。綬紺服繭。接車轆而沛艾。迺擇人而作牧。俾領使以勸耕。臣敢不芻豆銜恩。蒲鞭示化。種四萬頭之益。頗廣租分。耦五百兩之連。尤思糧衛。

擬侯亞除藉田令誥

農者天下之本也。朕躬耕藉田。率勸百姓。掌籍者必惟其材。蓋是職周爲甸師。漢祠先農。國朝俾與宗廟社稷之祀。爾壯而知本。穡事艱難。皆熟諳之。今擢爾令。宜殫竭其勞。亦服爾耕。以相我農民。匪但典祀事而已。往欽哉。無荒朕命。

代侯亞賀皇帝藉田禮成表

帝籍親臨。禮重三推之祀。皇恩大賚。歡陶萬宇之春。國典告成。臣工稱慶。竊以農而安本。國重勸民。載耒於保介之間。教放月令。掌甸爲黍盛之備。職隸天官。或歌祈社稷之詩。或下帥公卿之詔。金根登壇。朱紱于郊。皆非侈觀美之文。政以表躬耕之意。洋洋乎今日。展也盛儀。恭惟皇帝陛下。萬物觀乾。三登樂泰。仁禾善養。獨明穡事之艱。德稷惟馨。恪謹稼穡之奉。農祥正而土膏起。鹵畝饒而春日遲。雷動紺轅。擁百僚之穆穆。風生青耜。慶千耦之耘耘。爰畢農功。載親祠事。天地祖宗之歆格。和溢率璋。孝弟頒白之泳游。恩霑賜帛。金雞飛舞。寶咒忻懽。聿新曠代之逢。丕慰輿情之後。臣等叨隨擊壤。快觀回鑾。賈誼耕藉之言。已陪給祭。孟軻均田之說。尤冀行仁。

擬本斛除度支使詰

舜齊七政。量居其一。蓋微此不足以平天下之心也。苟非其材。不在茲選。爾中通而外直。體圓而用方。景山松栢。是斲是度。就匠之輪。以成厥器。乃命式于九圍。既戒既平。時靡有爭。朕已嘉汝績矣。今擢司計度。凡國賦之出納。軍儲之斂散。一歲幾何。悉資筭畫。爾其必有昔人不差升斗之長也。往祇使事。毋忽朕言。

代本斛謝表

乾圓合制。粗守均平。渙汗有華。忽陞計度。循牆祇奉。斂板欽承。伏念臣器本易盈。筭無足算。爲之以信。曾陳韓愈之言。割而不爭。徒抱莊周之志。故在取益。則圭撮不容少失。有所宜損。則黍勺勿使或加。職第謹於漢倉。政何裨於舜度。愧淺允工之報。邊叨經費之諮。矧歲計年支。貴不差於升斗。而沙量籌唱。期盡給

於椎蘇。慚無聚米之長。曷勝足食之任。茲蓋恭遇皇帝陛下。參天量廣。並日德明。無黨無偏。成洪範農時之用。有容有執。尊中庸既廩之賢。以平政而行仁。每量能而授職。遂令空竭。亦在簞揭。臣敢不益盡虛心。堅持端槩。出入幾何之間。所合講明。會計當矣之言。尙思佩服。

擬倉部高廩除提舉常平倉誥

蓄積以備水旱。此堯湯用心也。然司蓄積之職者。必惟其人。爾彌高之望。有容之德。其胷中何止藏百萬矣。頃典國儲。陳陳露積。乃且有賑貧拯乏之心。朕甚嘉之。常平使節。未嘗輕畀。今命汝往。以究其材。漢北邊之給。出京師之置。皆昔賢所講明者。可權度而舉行之。使吾民含哺鼓腹。咸遂一飽之樂。則朕益汝嘉往。惟欽哉。

代高廩到任謝表

廩曹分職。慚無一粟之裨。庚節叨榮。誤被六絲之造。穀涓問俗。粒飽知恩。伏念臣腹本空虛。慮先饑困。義重將軍之急。劍屢指糧。禮知賢者之尊。鼎加繼餽。幸遂坻京之詠。僅追園困之譏。方祈學稼以歸耕。忽俾集苞而爰度。豐凶品約。常思戴胃之規。貴賤權宜。盡究壽昌之策。第虞罄乏。曷副寵綏。茲蓋恭遇皇帝陛下。平政行仁。博施濟衆。先時備具。成湯捐瘠之思。以己視人。大禹溺饑之念。故當饋動人才之嘆。而旰食有民瘼之憂。豈伊器儲。亦廩器使。臣敢不棠知所發。飯不敢忘。馳隰而廣諮詢。具宣德意。視歲而爲歛散。加惠黎元。